

ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ԿԵՆՏՐՈՆԱԿԱՆ ԸՆՏՐԱԿԱՆ ՀԱՆՁՆԱԺՈՂՎ

27 հունիսի 2021թ.
ք.Երևան

N 184-Ա

Ո Ր Ո Շ ՈՒ Մ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱԶԳԱՅԻՆ ԺՈՂՈՎԻ
2021 ԹՎԱԿԱՆԻ ՀՈՒՆԻՍԻ 20-Ի ԱՐՏԱՀԵՐԹ ԸՆՏՐՈՒԹՅՈՒՆՆԵՐԻ
ԱՐԴՅՈՒՆՔՆԵՐՆ ԱՄՓՈՓԵԼՈՒ ՄԱՍԻՆ

«Հայաստանի Հանրապետության ընտրական օրենսգիրք» Հայաստանի Հանրապետության սահմանադրական օրենքի (այսուհետ՝ Հայաստանի Հանրապետության ընտրական օրենսգիրք) 95-րդ հոդվածի 1-ին մասի համաձայն.

«1. Կենտրոնական ընտրական հանձնաժողովը սույն օրենսգրքի 75-րդ հոդվածով սահմանված կարգով և ժամկետում ամփոփում է ընտրությունների արդյունքները և ընդունում հետևյալ որոշումներից մեկը.

1) Ազգային ժողով ընտրվելու և մանդատների բաշխման մասին.

2) Ազգային ժողովի պատգամավորների մանդատների նախնական բաշխման մասին.

3) առանձին ընտրական տեղամասերում վերաքվեարկություն նշանակելու մասին.

4) Ազգային ժողովի ընտրություններն անվավեր ճանաչելու և ընտրությունների վերաքվեարկություն նշանակելու մասին.

5) Ազգային ժողովի ընտրությունների վերաքվեարկությունն անվավեր ճանաչելու մասին: Այդ դեպքում Հանրապետության նախագահը նշանակում է Ազգային ժողովի նոր հերթական ընտրություն»:

Նույն հոդվածի 2-րդ մասի համաձայն. «Սույն հոդվածի 1-ին մասի 3-րդ, 4-րդ և 5-րդ կետերով նախատեսված որոշումները կենտրոնական հանձնաժողովն ընդունում է 101-րդ հոդվածով նախատեսված դեպքերում»:

Հիմք ընդունելով Հայաստանի Հանրապետության կենտրոնական ընտրական հանձնաժողովի 2021 թվականի հունիսի 27-ի՝ Հայաստանի Հանրապետության Ազգային ժողովի արհատերթ ընտրությունների քվեարկության արդյունքների վերաբերյալ արձանագրությունը, Հայաստանի Հանրապետության կենտրոնական ընտրական հանձնաժողովի 2021 թվականի հունիսի 27-ի «Հայաստանի Հանրապետության Ազգային ժողովի 2021 թվականի հունիսի 20-ի արտահերթ ընտրությունների արդյունքների վերաբերյալ» թիվ 183-Ա որոշումը Կենտրոնական ընտրական հանձնաժողովը գտնում է, որ Հայաստանի Հանրապետության ընտրական օրենսգրքի 95-րդ հոդվածի 1-ին մասի 3-րդ, 4-րդ և 5-րդ կետերով նախատեսված որոշումներն ընդունելու հիմքեր առկա չեն:

Հայաստանի Հանրապետության ընտրական օրենսգրքի 95-րդ հոդվածի 3-րդ և 4-րդ մասերի համաձայն.

«3. Եթե Կենտրոնական ընտրական հանձնաժողովը չի ընդունել սույն հոդվածի 1-ին մասի 3-րդ, 4-րդ և 5-րդ կետերով նախատեսված որոշումներից որևէ մեկը, ապա՝

1) Ազգային ժողով ընտրվելու և մանդատների բաշխման մասին որոշում ընդունվում է, եթե ընտրության արդյունքում ընտրություններին մասնակցող կուսակցություններից (կուսակցությունների դաշինքից) մեկը սույն հոդվածի 4-9-րդ մասերի հերթական կիրառման արդյունքում ստացել է սույն հոդվածի 4-9-րդ մասերով բաշխված մանդատների ընդհանուր թվի մեծամասնությունը.

2) Ազգային ժողովի պատգամավորների մանդատների նախնական բաշխման մասին որոշում ընդունվում է, եթե ընտրություններին մասնակցող կուսակցություններից (կուսակցությունների դաշինքից) ոչ մեկը սույն հոդվածի 4-9-րդ մասերի հերթական կիրառման արդյունքում չի ստացել սույն հոդվածի 4-9-րդ մասերով բաշխված մանդատների ընդհանուր թվի մեծամասնությունը: Սույն օրենսգրքի 96-98-րդ հոդվածներին համապատասխան՝ որոշ կուսակցություններին (կուսակցությունների դաշինքներին) լրացուցիչ մանդատներ բաշխելու դեպքում մյուս կուսակցությունները (կուսակցությունների դաշինքները) պահպանում են նախնական բաշխման արդյունքում իրենց հասանելիք մանդատները:

4. Ազգային ժողովի մանդատները բաշխվում են այն կուսակցությունների (կուսակցությունների դաշինքների) ընտրական ցուցակների միջև, որոնք ստացել են կողմ քվեարկված քվեաթերթիկների ընդհանուր թվի և անճշտությունների թվի գումարի՝ կուսակցության դեպքում՝ 5, իսկ կուսակցությունների դաշինքի դեպքում՝ 7 տոկոս կողմ քվեարկված քվեաթերթիկներ: Եթե կողմ քվեարկված քվեաթերթիկների ընդհանուր թվի և անճշտությունների թվի գումարի առնվազն 5 (7) տոկոս կողմ քվեարկված քվեաթերթիկներ ստացել են 3-ից պակաս կուսակցություն (կուսակցությունների դաշինք), ապա մանդատների բաշխմանը մասնակցում են առավելագույն կողմ քվեարկված քվեաթերթիկներ ստացած 3 կուսակցությունները և կուսակցությունների դաշինքները:»:

Նշված իրավադրույթների պահանջներին համապատասխան մանդատների բաշխմանը մասնակցում են՝

1. «Քաղաքացիական պայմանագիր» կուսակցությունը՝ կողմ քվեարկված քվեաթերթիկների թիվը՝ 688.761 (53.91%).

2. Հայաստան դաշինքը՝ կողմ քվեարկված քվեաթերթիկների թիվը 269.481 (21.09%).

3. «Պատիվ ունեմ» դաշինքը՝ կողմ քվեարկված քվեաթերթիկների թիվը 66.650 (5.22%):

Ազգային ժողովի մանդատները բաշխվում են կուսակցությունների, կուսակցությունների դաշինքների միջև՝ նրանցից յուրաքանչյուրին կողմ քվեարկված քվեաթերթիկների թվին համամասնորեն: Յուրաքանչյուր կուսակցության, կուսակցությունների դաշինքի հասանելիք մանդատների թվի հաշվարկը կատարվում է հետևյալ կերպ. յուրաքանչյուր կուսակցությանը, կուսակցությունների դաշինքին կողմ քվեարկված քվեաթերթիկների թիվը բազմապատկվում է 101-ով, արդյունքը բաժանվում է արգելապատնեշը հաղթահարած կուսակցություններին, կուսակցությունների դաշինքին կողմ քվեարկված քվեաթերթիկների ընդհանուր թվի վրա (այդ թիվն է 1.024.892), և առանձնացվում են ամբողջ թվերը, որոնք յուրաքանչյուր կուսակցության, կուսակցությունների դաշինքի հասանելիք մանդատների թվերն են:

Մինչև 101 մանդատ մնացած մանդատները կուսակցությունների, կուսակցությունների դաշինքների միջև բաշխվում են ըստ մնացորդների մեծության հերթականության՝ յուրաքանչյուրին մեկական մանդատ սկզբունքով: Մնացորդների մեծության հավասարության դեպքում վիճարկվող մանդատը տրվում է այն կուսակցությանը, կուսակցությունների դաշինքին, որին կողմ քվեարկված քվեաթերթիկների թիվն ամենամեծն է, իսկ դրանց հավասարության դեպքում մանդատը տրվում է վիճակահանությամբ:

Վերը նշված իրավակարգավորումներին համապատասխան Ազգային ժողովի մանդատները բաշխվում են հետևյալ համամասնությամբ՝

1. «Քաղաքացիական պայմանագիր» կուսակցություն - 68 մանդատ.
2. Հայաստան դաշինք - 26 մանդատ.
3. «Պատիվ ունեմ» դաշինք - 7 մանդատ:

Հայաստանի Հանրապետության ընտրական օրենսգրքի 95-րդ հոդվածի 9-րդ մասի համապատասխան ազգային փոքրամասնության ներկայացուցիչների մանդատները կուսակցությունների (կուսակցությունների դաշինքների) միջև բաշխվում են՝

Կուսակցության, կուսակցությունների դաշինքի անվանումը	Մանդատների քանակը	Մանդատ ստացող ազգային փոքրամասնություն
«Քաղաքացիական պայմանագիր» կուսակցություն	3	եզդի ռուս քուրդ
Հայաստան դաշինք	1	ասորի

Հայաստանի Հանրապետության ընտրական օրենսգրքի 95-րդ հոդվածի 3-րդ մասի 1-ին կետի համաձայն՝ Ազգային ժողով ընտրվելու և մանդատների բաշխման մասին որոշում ընդունվում է, եթե ընտրության արդյունքում ընտրություններին մասնակցող կուսակցություններից, կուսակցությունների դաշինքից մեկը 95-րդ հոդվածի 4-9-րդ մասերի հերթական կիրառման արդյունքում ստացել է 95-րդ

հողվածի 4-9-րդ մասերով բաշխված մանդատների ընդհանուր թվի մեծամասնությունը:

Իրականացված հաշվարկների արդյունքում «Քաղաքացիական պայմանագիր» կուսակցությունը ստացել է 71 մանդատ, որը կազմում է մանդատների ընդհանուր թվի (որպես ընդհանուր թիվ հիմք է ընդունվում 105-ը) 2/3-ից ավելի:

Հայաստանի Հանրապետության ընտրական օրենսգրքի 96-րդ հոդվածի 2-րդ մասի համաձայն.

«Եթե որևէ կուսակցություն սույն օրենսգրքի 95-րդ հոդվածի 4-9-րդ մասերի հերթական կիրառման արդյունքում ստացել է 95-րդ հոդվածի 4-9-րդ մասերով բաշխված մանդատների ընդհանուր թվի 2/3-ից ավելին, ապա մյուս կուսակցություններն ստանում են այնքան նվազագույն թվով լրացուցիչ մանդատներ (ԼՄ), որ արդյունքում նրանց մանդատների ընդհանուր թիվը լինի Ազգային ժողովի մանդատների ընդհանուր թվի 1/3-ից ոչ պակաս: Յուրաքանչյուր կուսակցությանը հասանելիք լրացուցիչ մանդատների թիվը որոշվում է հետևյալ կերպ. այդ կուսակցության ստացած մանդատների թիվը բազմապատկվում է ԼՄ թվով, ստացված թիվը բաժանվում է լրացուցիչ մանդատներ ստացող կուսակցությունների՝ մինչև լրացուցիչ մանդատներ տալը ստացված մանդատների ընդհանուր թվի վրա, և առանձնացվում են ամբողջ թվերը, որոնք տվյալ կուսակցությանը հասանելիք լրացուցիչ մանդատների թվերն են: Մնացած մանդատները կուսակցության միջև բաշխվում են ըստ մնացորդների մեծության հերթականության՝ յուրաքանչյուրին մեկական մանդատ սկզբունքով: Մնացորդների մեծության հավասարության դեպքում վիճարկվող մանդատը տրվում է այն կուսակցությանը, որի մանդատների թիվն ամենամեծն է, իսկ դրանց հավասարության դեպքում մանդատը տրվում է վիճակահանությամբ:»:

Հայաստան դաշինքը և «Պատիվ ունեմ» դաշինքը պետք է ստանան այնքան նվազագույն թվով լրացուցիչ մանդատներ, որ արդյունքում նրանց մանդատների ընդհանուր թիվը լինի Ազգային ժողովի մանդատների ընդհանուր թվի 1/3-ից ոչ պակաս: Նկատի ունենալով այն հանգամանքը, որ «Քաղաքացիական պայմանագիր» կուսակցության մանդատների թիվը կազմում է 71, ապա Հայաստան և «Պատիվ ունեմ» դաշինքների մանդատների թիվը պետք է կազմի 36՝ Հայաստանի Հանրապետության ընտրական օրենսգրքի 96-րդ հոդվածի 2-րդ մասով սահմանված Ազգային ժողովի մանդատների ընդհանուր թվի 1/3-ից ոչ պակասն ապահովելու համար: Նշված 36 մանդատներից 27 մանդատը Հայաստան դաշինքի, իսկ 7-ը՝ «Պատիվ ունեմ» դաշինքի ստացած մանդատներն են, իսկ նշված դաշինքներին ընդհանուր պետք է տրվի 2 լրացուցիչ մանդատ:

Նշված երկու լրացուցիչ մանդատը Հայաստան և «Պատիվ ունեմ» դաշինքների միջև բաշխվելու է Հայաստանի Հանրապետության ընտրական օրենսգրքի 96-րդ հոդվածի 2-րդ մասով սահմանված կանոնի կիրառմամբ՝ այն է Հայաստան և «Պատիվ ունեմ» դաշինքների ստացած մանդատների թիվը բազմապատկվում է լրացուցիչ մանդատների թվով, ստացված թիվը բաժանվում է լրացուցիչ մանդատներ

ստացող կուսակցությունների՝ մինչև լրացուցիչ մանդատներ տալը ստացված մանդատների ընդհանուր թվի վրա, և առանձնացվում են ամբողջ թվերը, որոնք տվյալ դաշինքին հասանելիք լրացուցիչ մանդատների թվերն են:

Հայաստանի Հանրապետության ընտրական օրենսգրքի 96-րդ հոդվածի համաձայն իրականացված հաշվարկի արդյունքում Հայաստան դաշինքն ստանում է 2 լրացուցիչ մանդատ:

Հիմք ընդունելով վերոգրյալը և ղեկավարվելով Հայաստանի Հանրապետության ընտրական օրենսգրքի 95-րդ հոդվածի 1-ին մասի 1-ին կետով, Հայաստանի Հանրապետության կենտրոնական ընտրական հանձնաժողովը

Ո Ր Ո Շ ՈՒ Մ Է.

1. Հայաստանի Հանրապետության Ազգային ժողովն ընտրվել է և մանդատները բաշխվում են՝

- 1) «Քաղաքացիական պայմանագիր» կուսակցություն - 71 մանդատ.
- 2) Հայաստան դաշինք - 29 մանդատ.
- 3) «Պատիվ ունեմ» դաշինք - 7 մանդատ:

2. Ընտրական ցուցակների 2-րդ մասից մանդատ ստացող ազգային փոքրամասնություն.

Եզդի	«Քաղաքացիական պայմանագիր» կուսակցություն
Ռուս	«Քաղաքացիական պայմանագիր» կուսակցություն
Ասորի	Հայաստան դաշինք
Քուրդ	«Քաղաքացիական պայմանագիր» կուսակցություն

3. Սույն որոշումն ուժի մեջ է մտնում նիստում հրապարակելու պահից:

4. Սույն որոշումը կարող է բողոքարկվել Հայաստանի Հանրապետության սահմանադրական դատարան՝ որոշման հրապարակման օրվանից հետո՝ 5-րդ օրը՝ մինչև ժամը 18.00-ն:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԿԵՆՏՐՈՆԱԿԱՆ ԸՆՏՐԱԿԱՆ
ՀԱՆՁՆԱԺՈՂՈՎԻ ՆԱԽԱԳԱՀ**

Տ. Մուկուչյան